



Broj: 03-08-05-33529/17
Sarajevo, 29.11.2017. godine

**PREDSJEDATELJICA SKUPŠTINE
KANTONA SARAJEVO**
gđa. Ana Babić

PREDMET : Odgovor na zastupničko pitanje

Na 34. Radnoj sjednici Skupštine Kantona Sarajevo, održanoj dana 31.10.2017. godine, u okviru tačke Dnevnog reda „Zastupnička pitanja, inicijative i odgovori“, zastupnica u Skupštini Kantona, Bibija Kerla je postavila slijedeće zastupničko pitanje:

„Tražim od Kabineta premijera Kantona Sarajevo, Kabineta predsjedavajuće i zamjenika predsjedavajuće Skupštine i svih ministarstava Kantona da mi odgovore da li u ovom mandatu imaju osobe angažovane izvan sistema državne službe, na privremenim ugovorima o djelu ili radu.

Tražim da dostave ugovore iz kojih se vidi opis poslova koje rade, te izvještaji o urađenom.

Tražim izjašnjenje svakog organa koji ih ima o pravnoj osnovi za takve ugovore, obzirom da su izvan Zakona o državnoj službi, Zakona o namještenicima, Zakona o radno-pravnom statusu članova Vlade i Zakona o platama.

Posebno tražim od svakog ministarstva da navede da li su i koje od ovih osoba nakon toga zaposlene na stalno radno mjesto.

Tražim očitovanje Pravobranilaštva da li je ovim ugovorima prekršen zakon i nanešena šteta Kantonu Sarajevo, te da li su poduzeli aktivnosti na zaštiti zakonitosti”

Ministarstvo pravde i uprave Kantona Sarajevo daje slijedeći

ODGOVOR

Poštovana zastupnice Kerla, u vezi Vašeg zastupničkog pitanja, obavještavamo Vas da je Ministarstvo pravde i uprave Kantona Sarajevo u ovom mandatu, u toku 2017. godine, angažovalo po osnovu ugovora o djelu pet diplomiranih pravnika i jednog namještenika koji su upućeni u Agenciju za državnu službu Federacije Bosne i Hercegovine. Također u Odbor državne službe za žalbe Federacije BiH upućena su tri diplomirana pravnika i jedan namještenik, a ovo ministarstvo je angažovalo jednog diplomiranog pravnika radi izvršavanja administrativno - tehničkih poslova vezanih za izradu propisa, a razlozi su slijedeći:

- Skupština Kantona Sarajevo 27.07.2016. godine usvojila je Zakon o državnoj službi u Kantonu Sarajevo („Službene novine Kantona Sarajevo“ broj 31/16), a odredbom člana 67. stav 1. propisano je:

„ Na osnovu principa utvrđenih u članu 8. ovog zakona, uz pismenu saglasnost Agencije, odnosno nadležnog organa Federacije Bosne i Hercegovine, ovim zakonom povjerava se: provođenje procedura zapošljavanja državnih službenika, organizacija i realizacija obuke državnih službenika,



organizacija edukacije kandidata za polaganje ispita koji predstavlja uslov za rad u organima državne službe Kantona, Grada i općina, Agenciji za državnu službu Federacije Bosne i Hercegovine.“

Podsjećamo, da se Skupština Kantona Sarajevo na prijedlog Vlade Kantona Sarajevo, odlučila da neće osnivati Agenciju za državnu službu niti Odbor državne službe za žalbe, nego će te poslove za Kanton Sarajevo, Grad Sarajevo i općine na teritoriju Kantona Sarajevo i dalje obavljati ADS Federacije BiH i Odbor državne službe za žalbe Federacije BiH.

U Budžetu Kantona Sarajevo za 2017. godinu na poziciji Ministarstva pravde i uprave osigurana su sredstva u iznosu od 35.000 KM za namjenu - **obavljanje zakonom prenesenih poslova**, ali se ista nisu mogla u 2017. godini doznačiti u korist Agencije za državnu službu Federacije BiH, zbog nemogućnosti prijema transfera upućenog ADS-u F BiH od strane Kantona Sarajevo. Da bi se postojeći problem otklonio, Ministarstvo je zatražilo dostavu prijedloga utroška sredstava radi angažovanja neophodnog stručnog kadra, koji je potrebno angažovati, kako bi se povjereni poslovi izvršavali na način i u skladu sa rokovima utvrđenim zakonom. Agencija je dostavila odgovor, u kojem je potreban angažman pet diplomiranih pravnika i jednog namještenika srednje stručne spreme, čime bi se doprinijelo izvršavanju poslova koji je Kanton Sarajevo povjerio Agenciji. Ministarstvo je zaključilo ugovore sa četiri diplomirana pravnika i jednim namještenikom za period od 15.08.2017. do 31.12.2017. godine, te sa jednim pravnikom u periodu od 18.09.2017. do 31.12.2017. godine.

- odredbom člana 68. stav 1. Zakona propisano je:

„Na osnovu principa utvrđenih u članu 8. ovog zakona, uz pismenu saglasnost Odbora za žalbe, odnosno nadležnog organa Federacije Bosne i Hercegovine, ovim zakonom povjerava se Odboru državne službe za žalbe Federacije Bosne i Hercegovine, da u drugom stepenu odlučuje o svim žalbama koje se izjave na rješenja rukovodioca organa državne službe, Gradonačelnika, odnosno načelnika i o žalbama koje se izjave na odluke Disciplinske komisije, u skladu sa zakonom, podzakonskim propisima, općim aktima i kolektivnim ugovorom.“

Iz već navedenih razloga nemogućnosti prenosa sredstava sa pozicije Ministarstva također i na Odbor državne službe za žalbe Federacije BiH, za koji su u Budžetu osigurana sredstva u iznosu od 35.000 KM, zatražena je dostava prijedloga angažovanja neophodnog stručnog kadra, kako bi se povjereni poslovi u Odboru izvršavali u skladu sa rokovima utvrđenim zakonom. Odbor je dostavio odgovor, u kojem se traži angažman tri diplomirana pravnika i jednog namještenika srednje stručne. Ministarstvo je zaključilo ugovore sa tri diplomirana pravnika i jednim namještenikom za period od 14.08.2017. do 31.12.2017. godine, te zbog raskida ugovora od strane jednog pravnika zaključen je ugovor sa drugim pravnikom od 06.11.2017. do 31.12.2017. godine.

Dana 10.10.2017. godine dostavljen je dopis navedenim institucijama u kojem su blagovremeno obaviješteni, da u cilju dalje provedbe Zakona o državnoj službi u Kantonu Sarajevo u narednom periodu, u Nacrtu Budžeta Kantona Sarajevo za 2018. godinu na poziciji Ministarstva pravde i uprave planirana su sredstva u visini od po 35.000 KM, (za ADS-u i Odboru za žalbe) za transfere drugim nivoima vlasti. Na ovaj način će se model koji smo koristili u ovoj 2017. godini institucionalizirati u narednoj godini, te smo zatražili, da sa Vladom Federacije BiH poduzmu aktivnosti na prijemu transfera u svrhu stvaranja dodatnih kapaciteta radi blagovremenog i efikasnog obavljanja povjerenih poslova u ime institucija Kantona Sarajevo.



- U Programu rada Ministarstva pravde i uprave za 2017. godinu je planirana izrada izuzetno zahtjevnih propisa i to: Amandmani na Ustav Kantona Sarajevo, Zakon o lokalnoj samoupravi, Zakon o imovini Kantona Sarajevo, Zakon o plaćama i naknadama u organima vlasti Kantona Sarajevo, Zakon o dopuni Zakona o zaštiti pripadnika nacionalnih manjina u Kantonu Sarajevo, Zakon o izmjenama i dopunama Zakona o proglašavanju žalosti u Kantonu Sarajevo i Zakon o izmjeni i dopuni Zakona o pružanju besplatne pravne pomoći. Ovo ministarstvo, koje ima samo šest diplomiranih pravnika i dva inspektora, te iz razloga nepopunjenosti sistemetizovanih radnih mjesta, a radi ispunjavanja programskih ciljeva, angažovalo je jednog diplomiranog pravnika u periodu od 15.05.2017 do 17.11.2017. godine. Poslovi koje je obavljao angažirani po osnovu ugovora o djelu se odnosi na poslove koji nisu u opisu poslova ostalih državnih službenika Ministarstva.

U vezi upita da li je neko od navedenih osoba primljen u radni odnos, informišemo da niti jedna osoba nije zasnovala radni odnos u navedenim institucijama.

Prilog:

- Ugovori o djelu zaključeni sa sa izvršiocima (ukupno 12) sa izvještajima.

S poštovanjem,

MINISTAR

Mario Nenadić



web: <http://mpu.ks.gov.ba>
e-mail: pravda@ks.gov.ba
Tel: + 387 (0) 33 562-083, Fax: + 387 (0) 33 562-241
Sarajevo, Reisa Džemaludina Čauševića 1

